

# Lobing per la Rumantschia

Sairada rumantscha en la chasa federala

DA LUCAS DEPLAZES / ANR

■ **Impressiunanta è stada la participaziun da las parlamentarias e dals parlamentarists a la terza sentupada da la gruppa parlamentara «lingua e cultura rumantscha» a Berna la mesemna saira en la Galerie des Alpes en la chasa federala.** *Martin Candinas*, il president da la gruppa, ha dastgà beneventar politichers e politicheras da tuttas partidas politicas che demussan interess per la minoritad rumantscha. Suenter il bainvegni musical da *Mario Pacheloli* è vegnida beneventada l'actuala presidenta dal cussegl naziunal, *Christa Markwalder*. La presidenta bernaisa *Christa Markwalder* ha ragischs che tanschan fin en il Grischun. En il Grischun ha ella emprendì dad ir cun skis. Per sa preparar sin la sessiun da Flem l'onn 2006 ha ella fatg in pitschen curs da rumantsch. Per ch'ella n'emblidia betg ils Rumantschs ha la Lia Rumantscha surdà ad ella ina (extra-gronda) clavina rumantscha.

## Adia Corina Casanova

La gruppa parlamentara rumantscha ha er undrà *Corina Casanova* per sias considerablas stentas en favur dal rumantsch. La chanceliera rumantscha che ha dirigi durant otg onns il post da stab dal cussegl federal va uss en pensiun. *Corina Casanova* haja fatg fitg bler per il rumantsch, ha punctuà *Candinas*.

## Simpatica visita culturala

Gronda atenziun e blers bitschs han chattà acturas ed acturs e lur reschissur dal nov film «Uorsin – Schellen-Ursli». Els èn propi stads ils stars da la saira e fatg attent ch'il Grischun n'è betg mo in chantun da lingua tudestga, mabain in chantun cun ina remartgabla part latina. Memia savens vegn il Grischun considerà a Berna sco chantun da linguatg tudestg.

## Preschientscha è impurtant

A Berna existan passa 100 gruppas parlamentaras d'interess (ditg pli modern gruppas da lobing), ha punctuà il presi-



Christa Markwalder, Martin Candinas, Urs Cadruvi.



Corina Casanova, Stefan Engler (a san.), Martin Candinas.

FOTOS L. DEPLAZES

dent da la gruppa parlamentara «Lingua e cultura rumantscha», cusseglier naziunal *Martin Candinas* envers l'Agentura da novitads rumantscha. En quest mund da lobi ha bain er plaz ina gruppa rumantscha, ha el manegià. La preschientscha rumantscha en il parlament saja da gonda muntada, gist uss che ha cumenzà in nov parlament sia legislatura. Impurtant sajan ils contacts

cun ils collegas sur il cunfins politics or, plinavant da marcar preschientscha e da far attent co ch'ils daners da la confederaziun vegnan impundids. Il parlament federal duai far per senn nua ch'ils daners van ed avair la perschiasion: Il rumantsch viva ed el vul viver, ha punctuà il fundatur ed animatur da la gruppa parlamentara rumantscha en il parlament federal.